

# TUNGOD SA PAGTOO, SI MOISES



Salamat, Igsoong Neville. Maayong buntag, mga higala. Pagkaanindot nga maania dinhi karon sa tabernakulo. Ug nahunahuna nako nga kung nahangyo ko lang si Igsoong Neville nga siya ang mowali niining buntaga, unyang gabii na lang ako. Ug nahunahunaan ko pud nga magpahigayon og leksyon pang-Sunday school niining buntaga. Ug daw sa unsa nga... Kon itugot sa Ginoo, paningkamotan nato nga—nga magkaaduna niining leksyon pang-Sunday school.

<sup>2</sup> Bueno, mga duha na ka semana karon, kapin kon kulang, sukad sa akong pagbalik. Ug ginerbiyos ako pag-ayo ingon na sa inyong nahibal-an, tungod, sa natad sa misyon, nga mibati ko og grabeng, grabeng kakapoy kaayo ug halos maglisud na nga makapadayon pa. Ug mao nga kinahanglan ko nga mopauli para makapahulay og gamay. Ug didto ako mga tulo ka adlaw sa Wolf Creek Dam, sa Kentucky, kon diin didto ako natawo. Nahunahuna ko, “Oh, maanindot na ang akong gibati karon. Maayo na ako.”

<sup>3</sup> Ug sa nakauli na ako, ug ang unang gamay’ng butang nga mitagbo kanako mao ang usa ka klase nga buhisonon sa gobyerno. Nahugno na usab ko. Busa naamgohan nako nga magkinahanglan gyud ko og sobra pa sa usa o duha ka semana para makapahulay gyud ako.

<sup>4</sup> Ug hapit na magbag-o ang akong ministerio sa karon. Ug wala pa’y akong gikatakda nga mga buluhaton. Ug mao kana ang hinungdan nga medyo gusto ko usá mag-relaks, ug gihunahana ko, nga karon sa sunod pipila ka mga semana, magpahulay lang sá ko, completong pahulay, ug magpaabot sa giya sa Ginoo.

<sup>5</sup> Ug daghan kaninyong mga tawo dinhi, nga mga beterano na, nga dugay na nga nag-uban kanamo, hinumdumi kung unsa ang gisulti sa Ginoo kanato, kanunay gyud Niyang gibuhat kung unsa ang gisulti Niya nga Iyang buhaton.

<sup>6</sup> Hinumdumi, niadtong mismo sa sinugdanan, sa iglesia dinhi, sa buntag nga gipahimutang nato ang bato sa tabernakulo, kung giunsa Niya... Nakasulat kini, diha sa panid sa akong Biblia, sa diha nga gipahimutang kadtong bato. Niadtong buntaga, ang kadtong dakung panan-awon, nag-ingon, “Dili kini ang imong tabernakulo.”

<sup>7</sup> Ingon ko, “Asa man diay, Ginoo?” Gipaadto Niya ako didto ubos sa kawanangan. Ug nadungog ko ang usa ka Tingog. Ug pagtan-aw ko ug nakita kadtong tulo ka mga krus, nga sama, sa mga kahoy ug may mga bunga kini, og uban pa. Kabalo na mo mahitungod sa maong panan-awon. Gisulat kini, daghang mga tuig na ang milabay.

<sup>8</sup> Sa miaging adlaw, nagkuha ako, og usa ka daang libro didto, gibasa ang pipila sa mga butang nga gisulti sa Ginoo, kadtong mga gitagna; nga natuman na. Mahitungod niining kahimtang sa mga kabatan-onan, ug mahitungod sa mamahimong resulta sa gubat, ug tanan niadtong mga butang nahanabo gyud nga eksakto.

<sup>9</sup> Adunay duha na lang ang nahabilin, sa niadtong dagkung mga propesiya. Kining, mahitungod sa mga sakyanan nga mamahimong remote control na samtang nagadagan diha sa kadalanan, nga ang porma sama sa usa ka itlog, nga dili na nimo kinahanglan pang imaneho. Ang sakyanan na mismo ang nagakontrol sa iyahang kaugalingon. Ug dayon dunay motungha nga usa ka kusgan nga babaye, tungod kay ang Amerika usa man ka babaye nga nasud. Ug pagkahuman... Usa ka bantugan nga babaye ang motungha, ug mahimong Presidente o ingon nga sama niana, dinhi sa nasud. Ug pagkahuman niana adunay moabot nga bug-os nga pagkagun-ob. Papason kining tibuok nasud.

<sup>10</sup> Ug, tungod niana, ginaprediktar ko... Karon dili ang Ginoo ang nagasulti niini. (Pero sa uban nga butang, ang mahitungod sa babaye, kini maoy, nagagikan sa Ginoo.) Pero giprediktar ko, sa 1933, nga ang kalibutan moabot sa bug-os nga pagkagun-ob sa dili pa ang '77.

<sup>11</sup> Bueno, wala pa ko'y hibangkaagan kaniadto nga sila aduna na'y usa ka butang nga makahimo sa pagpangpapas sama sa aduna na sila karon, pero nakita ko ang nasud diha sa bug-os nga pagkagun-ob, mga tuod nalang sa mga kahoy ug mga butang nga ingon niana, ang nahabilin.

<sup>12</sup> Busa, nagapadulong na gyud kita niini. Ug kung kining tanan nga ubang butang nangatuman sumala sa Iyang gisulti, mahinabo usab kini, sama ra sa gisulti Niya dinhi sa Kasulatan, sama sa Iyang pagkasulti, nga kung si Cristo mianhi sa unang higayon, moabot Siya sa ikaduhang higayon. Ug ang tanan nga mga butang nga gisulti Niya mangatuman gyud. Ug ingon nga nakita nato, ug nahibaloan nga kita'y... ang atong takna hapit na moabot, ingon nga nasud, sa pagkasayod nga ang Iglesia sa dili magdugay mahitabo na ang Pagsakgaw Niini. Ginapakulbahinam niini ang kasingkasing sa usa ka ministro, o ni kinsa man nga yanong magtotoo, ang mahibaloan nga ania na kita sa niining adlaw ug takna nga atong gikinabuhian. Kini ang pinaka- mahimayaon nga panahon nga gikinabuhian ni kinsa man nga tawo sa yuta, ang sa karong panahon mismo; kana'y, para sa Iglesia. Mao nga, gitinguha gyud nako ang inyong mga pag-ampo.

<sup>13</sup> Ug niining tungora akong nakita sa tabernakulo, ug akong nakita nga sila adunay... nga magkaaduna sila og pipila ka mga

pagpapili pag-usab ug tanan na, sa iglesia, para sa pipila ka mga miyembro sa hunta ug uban pa.

<sup>14</sup> Ug—ug nagkinahanglan ang iglesia og gamay'ng panagtigum, gamay'ng pag-uyog. Ug kanunay'ng buotan kaayo mo sa ako, ug napanalanginan ako. Ug ako nga ania karon, medyo nahimong panalangin usab para kaninyo. Ug sigurado ko, nga mahiuban lang kamo, panalangin na para kanako. Ug kanunay ninyong ginadawat kung unsa'y akong ginasulti nga Kamatuoran, ingon nga nakita ko kini tungod sa tabang sa Dios. Ug ako—mapasalamaton ako tungod niana.

<sup>15</sup> Busa, pagkabalik nako, ug dinha ko nahibaloan, ug nga kinahanglan pang itul-id ang atong iglesia, ang mga miyembro sa hunta niini, ug dayon ang mahitungod sa eleksyon ug uban pa. Ug dayon—dayon, nahunahuna ko, pagkahuman niana, mopauli na ako ug magpahulay gamay sa dili pa ako mobalik sa natad sa misyon pag-usab.

<sup>16</sup> Sa ato ra kini. Karon, dili kini para sa mga taga-gawas. Para lang kini sa niining tabernakulo. Gusto lang namo nga magmiting uban niining tabernakulo, para ang tanan, ug ang matag sayup, tanan nga mga butang nga nahanabo, ug tingali adunay gamay'ng mga pagmahay sa usa'g usa; sila, paanhion ko ang tagsa-tagsa kanila ug ipag-atubang ko mismo sila. Busa kung dili mo gustong atubangon kini, mas maayo pa nga mobiya ka na lang niining nasud; tungod kay siguradong atubangon mo gyud ang matag tipik niini, sama sa naandan na natong ginabuhat dinhi sa tabernakulo. Ug ang tanan pagahapsayon gyud, tungod kay kita nga mga igsoong lalaki ug igsoong mga babaye kinsa mao ang nagapikaspikas sa maong komunyon, ang Lawas ni Cristo, palibot sa lamesa sa maong mga panalangin. Ug wala na'y lain kondili ang yawa kini nga maoy nagabuhat og unsa mang butang aron pakasayupon, ug magpahinungdan og dili maayong mga pagbati, o mangbungkag, o unsa man nga butang sama niana. Ug kuyogon nako ang atong Igsoong Neville, ug mangadto kami gikan sa usa ka lugar ngadto sa usa pa ka lugar, ug ipaatubang ang mga tawo, sa usa'g usa, hangtud nga maibalik ang daang tabernakulo, mapalig-on pag-usab, sa tiil niini, sa pagpadayon para sa Ginghamlan sa Dios. Karon, mao kini, ang hinungdan nga gisulti ko kini, tungod kay para kini sa ato mismong gamay'ng panon dinhi karong buntaga.

<sup>17</sup> Ug karon kinahanglan kong magpahulay, ug mobalik sa labing madali kutob sa mahimo ko. Dayon nagapaabot ko nga mobiyahe pag-usab ngadto sa natad sa pagpang-misyon. Ug niining panahona, kon itugot sa Ginoo, gusto nakong gamiton ang atong gamay'ng natigum nga mga pundo, ug uban pa, lakip ang sa akoo, gamiton didto sa . . . niining programa sa pang-misyon ngadto sa ubang nasud. Ug mopalit ko og usa ka bag-ong tolda, ug pipila ka bag-ong kagamitan, ug gamiton kini sa pagpang-misyon. Dili nga magsumikad sa mga kaiglesihan,

kondili magpahigayon og atong kaugalingon mismong mga panagtigum.

<sup>18</sup> Karon, dili nga dili na panumbalingon ang mga kaigsoonan nga nag-imbatar kanako, diin maayo kaayo kana. Pero halos tanan man gud niini, makita mo sa niining mga kombensyon, pagmoingon sila nga moadto ka didto, ug dayon ang tanan mong mga higala motambong usab, ug pagkasunod niana daghan nang mga pagpaamot og mga salapi. Nagakahutdan hinoon og kuwarta ang mga tawo. Bag-ohay ko lang kana nahibaloan, nakita n'yo. Mao nga—nga dili kana husto. Gusto nato magkaaduna og lugar kon diin didto nato sila dad-on. Dili na kinahanglan nga magdala pa mo og salapi. Tambong lang kamo, mismo, ug—ug mag-alagad sa Ginoo. Kita n'yo? Ug busa karon. . .

<sup>19</sup> Ug dunay kabag-ohan nga nahanabo sa akong ministerio mismo karon. Nahinumduman ba ninyo nga ginagunitan ko ang kamot sa tawo kaniadto, ug magtindog lang dinha, ug ang Ginoo magsulti kanako kung unsa ang ilang problema. Nag-ingon, “Dayon mahitabo kini, nga mahibaloan mo ang tinago sa mga tawo.” Ang matag usa kaninyo nahibalo gayud nga natuman kana sa ingon ka eksakto gayud sa pagkasulti Niini. Karon kini ang sunod nga mahitabo, ingon nga gipropesiya ug gitagna na, nga mamahimong labaw pa kay sa kung unsa ang Kaniadto, nakita n'yo. Ug mismo sa karon nagakabag-o na kini.

<sup>20</sup> Ug mao kana ang hinungdan nga nagapakig-away kanako si Satanas pinaagi niining balayronon kono sa buhis, nga ginapamugos kanako, sa gobyerno, nga utangan kono ako og buhis sa matag sentimo nga akong nadawat, ingon nga ministro, sulod sa baynte-siete ka tuig, niadtong pagsugod ko pa kono sa ministerio. Dili kini ingon niana, tungod kay miagi man kadto tanan sa niining iglesia dinhi.

<sup>21</sup> Usa lamang ako ka piniyalan niining iglesia. Husto gyud kana. Anaa mismo kana sa mga rekord dinhi. Busa, kung ingon-ana man, kung ako usa ra ka tinugyanan-tresurero sa niining iglesia, nan wala ni unsa man sa kalibutan. . . Wala og unsa mang katungod niini ang gobyerno. Dili ang iglesia ang ilang ginausisa. Ako ingon nga tresurero sa iglesia ang ilang ginausisa. Ug ang mga tinugyanan nagpirma na og papeles nga atua na sa bangko, nga ang tanan nakong mga pundo. . . Imbes nga magkaaduna unta ako og kaugalingong foundation, gipasa ko kini ngadto sa akong iglesia dinhi, tungod kay awtomatikong foundation man kini, gihapon.

<sup>22</sup> Ug tungod niana, nakatabang kini sa ako nga pugngan ang pagpahilayo ko sa iglesia ug biyaan kini, ug nga basta nalang molakaw ug ingon nga dili importante dinhi. Human nga nagsaad ako sa mga tawo nga mobalik sa iglesia, matag karon ug unya, ug tabangan sila. Mao kana ang hinungdan kon

nganong padayon kong ginatuman kana, tungod kay nagsaad man ako kaninyo nga mga igsoon. Mao kana ang rason nga nagapabilin akong ingon niana, kaysa ngadto sa indibiduwal. Kay kung ingon-ana, kung buhaton ninyo kana, mahulog kini ngadto sa pagka-organisasyon. Ug hugot gayud ako nga supak sa organisasyon. Busa akong—ipapadayon ko lang kini sa kung unsa kini, diha sa mga kamot sa Dios, para makapadayon kita alang sa Gingharian sa Dios.

<sup>23</sup> Karon, niining buntaga, gusto natong tun-an kining bulahan nga daang Pulong, ug magtoo.

<sup>24</sup> Karon, gusto kong isulti, usab. . . nakita ko si Igsoong Egan ug daghan, sa mga tinugyanan nga nagalingkod dinhi, human nga nagkaaduna kami og miting sa mga tinugyanan, sa miaging gabii; tinuod kini, gipahibalo ko kini sa atubangan sa iglesia, nga ang matag usa kaninyo dili na usa—usa ka tinudlo nga mga tinugyanan. Mga pinili na kamo nga mga tinugyanan, ug gilista ang inyong ngalan diha sa mga libro. Sige.

<sup>25</sup> Ug karon magkaaduna sila og usa pa ka eleksyon para sa—sa mga diyakono, ug uban pa. Ug panawgon sila sa gilayon pagkahuman niining serbisyo, ni Igsoong Neville, sige, ug para sa pagka -tresurero ug uban pa, ingon nga ginahan-ay nato ang iglesia. Mahulipan ang mga bakante, ang tanang katungdanan, mahan-ay na, dayon puede na kitang magkaaduna og rebaybal pagmoabot man kini.

<sup>26</sup> Karon, sa dili pa nato ablihan ang mga panid dinhi, para sa atong leksyon pang-Sunday school, sa niining halangdong Pulong sa buhing Dios, iduko usá nato ang atong mga ulo, sa kadali, samtang nagapakig-estorya kita ngadto sa Tag-iya niining Basahon. Ug karon ihiklin n'yo usá ang matag hunahuna, ang tanang sukwahi, nga mahimong mopugong kaninyo sa pagdawat sa panalangin.

Mag-ampo kita.

<sup>27</sup> Labing balaan ug matarung nga Dios, nagaduol kami karon diha sa Imong mapanalanginon og hamiling Presensiya, nga ginahalad Kanimo ang among mga kinabuhi, ug ang among—among mga kalag, ug ang among mga lawas, ug ang among mga pagpangalagad, ang among mga talento. Ug ang tanan nga aduna kami, among ginahalad ang mga niini nganha Kanimo. Ug sa pagtan-aw Mo kanamo, Ginoo, kon aduna ma'y sala nga hayag ug wala-maisugid, nagapangamuyo kami Kanimo, O Ginoong Dios, nga ipahid Mo ang Dugo sa Imong Anak, nga si Jesus, sa maong dapit. Tungod, naamgo namo nga kon sa amo lang kaugalingon kami dili gyud igo, ug imposible gayud para kanamo nga mahimong tabangan ang among kaugalingon. Kondili bug-os kami nagasalig diha sa Iyang bililhong Dugo, ug sa Iyang grasya nga ma-iaplikar alang kanamo, nga kaming dili-takus nga mga makasasala makaduol nga may pagsalig sa

umalabot nga adlaw nganha sa Imong Presensiya, nga dala-dala sa among atubangan kining Dugo ni Ginoong Jesus. Nga, Ikaw, sa kaniadtong panahon, nag-ila niining Dugo sa Imong bugtong Anak, ug nagsaad, nga, “Pinaagi Kaniya, kon magsugid kami sa among mga sala, kami pagamatarungon pinaagi sa Iyang grasya.”

<sup>28</sup> Ug karon nagapangamuyo kami, Ginoo, nga pasayloon Mo kami sa bisan unsang sayup, sa bisan unsang sala nga paglapas o pagkapakyas, kalapasan, nga kon aduna ma’y dili maayong hunahuna nga nakasulod sa among kalag, tungod sa nagakalayo nga mga udyong sa yawa, nga Imong papahawaon kining dautan nga kaaway Nimo, ug sa Imong katawhan.

<sup>29</sup> Ug nagapangamuyo kami nga Imong ipadala ang Balaang Espiritu para dad-on ang Pulong niining orasa, samtang ginatugyan namo ang among kaugalingon ingon nga mga instrumento, aron Ikaw makigsulti pinaagi namo, ug magpaminaw pinaagi namo, sa Imong Pulong. Ug ingon nga balus dawaton namo Kini ingon nga gikan Kanimo, ug biyaan namo kining lugar, unya, nga may pagbati nga kami naihusto na ngadto sa kawsa ni Cristo; aron nga kami mamahimong mas takus para sa panerbisyo karong gabii ug ugma, tungod sa pagduaw sa Balaang Espiritu.

<sup>30</sup> Panalangini ang among mga kaigsoonan sa tanang dapit, ang mga kaiglesiahan sa tibuok kalibutan, nga ginabayaw ang Pulong sa Kinabuhi sa niining dautan nga kapanahonan. Mabati namo nga wala na’y igong oras nga nahabilin para manglimbasog, tungod kay ang gabii paspas nga nagaabot. Ang panganod sa gubat nagapaibabaw na pag-usab. Ang kadautan haduol na kaayo, ug nagaampo kami nga Imong itugot kanamo nga makapamuhat ingon nga wala pa namo sukad nahimo. Hatagi’g pahulay ang among gikapoy nga mga lawas, Ginoo, ug dayon ipadala kami pag-usab ngadto sa natad sa panggubatan. Tungod kay among ginapangamuyo kini sa Ngalan ni Ginoong Jesus, ug alang Kaniya. Amen.

<sup>31</sup> Samtang ablihan nato, ang Biblia, karong buntag, ang—ang ika-11 nga kapitulo sa Basahon sa Mga Hebreohanon.

<sup>32</sup> Niadtong Miyerkules sa gabii gihisgotan nato ang ika-7 nga kapitulo sa Basahon sa Mga Hebreohanon, mahitungod kang “Melquisedec, ingon nga wala’y amahan, ug wala’y inahan, wala’y sinugdanan sa mga adlaw, o wala’y katapusan sa kinabuhi.”

<sup>33</sup> Ug akong gihunahuna, nga tingali, karong buntag, angay lang nga ablihan nato pag-usab kining maanindot nga Basahon, ingon nga aduna na kita’y kasayuran sa kung unsa ang gusto natong ihisgotan, tungod sa miagi natong mga gibasa. Ug molaktaw kita sa ika-10 nga kapitulo, ug ang ika-9 nga kapitulo, nga mao ang mga balaod sa pagsakripisyo, moadto kita sa

hilisgotanan mahitungod sa “pagtoo.” Ug dinhi sa Basahon sa Mga Hebreohanon, ang ika-11 nga kapitulo, ug sugod sa ika-23 nga bersekulo, mabasa nato Kini nga sama niini:

*Tungod sa pagtoo si Moises, sa iyang pagkatawo, gitagoan sa iyang mga ginikanan sulod sa totulo ka bulan, kay nakita nila nga siya maoy usa ka matahum nga bata; ug sila wala mahadlok sa sugo sa hari.*

*Tungod sa pagtoo si Moises, sa diha nga nagdaku na siya, wala mosugot nga paganganlan nga anak sa anak nga babaye ni Faraon;*

*Kondili nagpalabi hinoon sa pagpakig-ambit sa maong kagul-anan uban sa mga tawo sa Dios, kay sa pagpahimulos sa mga kalipayan sa sala sulod sa usa ka panahon;*

*Nga nag-isip nga ang pagkatalamayon ni Cristo labi pang dakung bahandi kay sa mga bahandi sa Egipto: . . . ug nga nagpaabot siya ngadto sa balus sa katumbasan.*

*Tungod sa pagtoo mibiya siya sa Egipto, sa walay kahadlok sa kaligutgot sa hari: kay nagpadayon siya nga daw nakakita sa di-makita.*

<sup>34</sup> Gusto kong hisgotan ang hilisgotanan, karong buntaga nga, “pagpili pinaagi sa pagtoo.” Ug gusto kong pagadad-on ang teksto, ang unang tulo ka mga pulong sa ika-23 nga kapitulo, *Tungod Sa Pagtoo, Si Moises*. Ug ang, “pagpili pinaagi sa pagtoo,” sa halos tanang butang nga atong ginabuhat, kinahanglan natong mopili pinaagi sa pagtoo. Ug ang tanan nga makita nato nga gibuhat ni Moises, nga angay sundon, kadtong mga gibuhat niya pinaagi sa pagtoo; dili pinaagi sa makita, kondili pinaagi sa pagtoo.

<sup>35</sup> Ug ang hinungdan nga akong gipili kini karong buntaga, tungod kay ang iglesia sa niining estado, ingon na niana sa atong . . . bisan sa atong mga tulunghaan, ug sa palibot, daghan na kaayo kita og siyentipikong mga pagpanudlo. Tungod niana, gipahilayo nato ang mga tawo gikan sa pagtoo. Karon, ang pagtoo dili gayud mapamatud-an pinaagi sa siyensiya. Ang pagtoo dili makita sa siyensiya. Ug atong . . . Kung mawala kanato kining dakung pagtoo, nan anaa kita diha sa hingpit nga kangitngit, kini . . . bisan unsa pa kita ka edukado, bisan unsa pa kita ka maayo mag-esplikar sa Pulong sa Dios, nga maipasabot Kini sa kung unsa ang atong ginatoohan.

<sup>36</sup> Wala na’y ubang paagi nga mapahimuot ang Dios, pinaagi lamang sa pagtoo. Tin-aw kaayo nga gisulti kini sa Kasulatan sa ingon niana nga paagi, ug kini pinaagi sa pagtoo. “Ug kon walay pagtoo,” nagaingon ang Kasulatan, “dili gayud mahimo ang pagpahimuot sa Dios.”

37 Busa, kon ang pagtoo dili-nagauyon sa siyensiya, ug ang siyensiya dili-nagauyon sa pagtoo, nagabutang kana kanila sa—sa pagkabatok sa usa'g usa, kung ingon niana kinahanglan nato nga magpili sama sa gibuhat ni Moises. Pinaagi sa pagtoo kita nagatoo!

38 Karon, kung mawad-an kita sa pagtoo, kung ingon niana dili gayud nato maangkon ang tubag sa Dios sa atong pag-ampo. “Kay siya nga nagaduol sa Dios kinahanglan uná nga motoo nga mao Siya, ug maoy magbabalus sa mga nagapangita gayud Kaniya.” Mao nga, kung mawad-an kita sa pagtoo, walay epekto ang atong mga pag-ampo; wala gyud kita’y mapaingnan.

39 Mao nga ang tanan nga mahimo natong hunahunaon, karong buntaga, mao ang paggunit ngadto sa pagtoo. Tungod kay, kung mawad-an kita sa pagtoo, ang tanan natong mga paglaum mawala. Ug kung mawad-an kita sa pagtoo, ang tanan natong espirituhanong realidad mawala. Tungod kay, dili ka puedeng magkaaduna og pagtoo sa mga butang nga imong makita, kay ang mga butang nga imong makita tanan mangahanaw man.

40 Kung magtan-aw kita sa usa ka halangdong tawo, usa ka halangdong ministro, o usa ka dakung kongregasyon, silang tanan mangahanaw man, sa umalabot nga adlaw. Ug kung magtan-aw kita sa usa ka bantugan nga nasud, o sa usa ka dakung hinagiban, silang tanan mangahanaw man, sa umalabot nga adlaw. Ug kung ingon niana kinahanglan natong magkinabuhi pinaagi sa pagtoo, bahin sa mga butang nga dili maipahayag sa siyensiya. Pinaagi sa pagtoo lang nga kita nagatoo.

41 Bueno, mawad-an kita og himaya kung mawad-an kita sa pagtoo. Karon, kung mobiya kita gikan sa pagtoo, kung ingon-ana ginadala nato ang iglesia ngadto sa kahintang pang-intelektuwal.

42 Ug daghang mga higayon, nga nagadahum, ang mga tawo, nga tungod kay ang kongregasyon daku man, ug aduna sila og dagkung mga iglesia, dagkung mga talinis nga atup, ug daghang inila, mga maayo'g-binistihan ug nakapostura nga mga mananambong, ug daghang mga salapi, nga makaya nila ang maong mga butang, daghang mga higayon, nga kita, nagadahum kita nga kini dinihogan, nga kining iglesia siguradong dinihogan gayud. O, kanunay natong ginatan-aw kining nagkalainlaing mga ministro nga nagasangyaw didto sa natad sa pagpang-misyon ug nagapahigayon og dagkung mga tigum sa mga tawo, ug nagahunahuna kita, usahay, nga kini mga ilhanan nga sila’y dinihogan. Pero dili kana tanan kamatuoran. Pagdihog kana nga iya sa tawo.

43 Pero ang tinuod nga pagdihog nagaabot pinaagi sa pagbuhat sa kabubut-on sa Dios. Kita n’yo? Kung nag-inusara man kini, o usa lamang ka hagkom. Daku man kini nga iglesia, o gamay’ng



iglesia, dili kini importante. Kung inila man siya, larino man manulti nga mamumulong, o usa ka yanong tawo nga maglisud og hibalo sa iyang ABC, dili kini importante. Nakadepende kini sa mensahe nga dala niya, kung dinihogan ba kini pinaagi sa Pulong sa Dios, o, dinihogan ba kini sa pang-intelektuwal nga mga panabot sa tawhanong inspirasyon?

<sup>44</sup> Ang uban sa mga tawo mahimong madasig tungod sa kalarino manulti sa mamumulong. Dili kana nagapasabot nga husto kana. Usahay sila'y mga dinihogan tungod kay ang tawo nabansay man pag-ayo nga mahimo niyang ilatag ang punto niya. Dili kana nagapasabot nga kini gikan sa Dios. Kita n'yoy?

<sup>45</sup> Pinaagi lamang sa walay katapusan, Eternal nga balaang Pulong sa Dios, nga makadawat kita og pagdihog, ug kana'y gihatag pinaagi sa Espiritu Santo. Ug pinaagi sa pagtoo nga madawat nato kini.

<sup>46</sup> Karon hunahunaon nato si Moises, ug kadtong mahinungdanong panahon sa iyang kinabuhi. Ug mabasa nato balik, ang mahitungod sa iyang pagkahimugso, ug kung giunsa siya sa pag-atiman sa Dios, pero aduna og panahon sa kinabuhi ni Moises kon diin kinahanglan magkaaduna siya og kahigayonan sa pagpili. Kung basahon nato sa husto, makita nato nga nahimo siyang usa ka anak nga lalaki sa anak nga babaye ni Faraon, ug manununod kaniadto sa trono, ug mamahimo unta nga sunod nga faraon sa Egipto. Busa iyang namatikdan samtang naglantaw siya sa palibot, human nga ana na siya sa hustong edad ug kaakuhan, ug nakita niya kadtong mga ulipon nga nagatrabaho didto sa lapukon nga mga lungag. Ug si Moises, nga nagalantaw didto sa mga bintana sa palasyo, ngadto sa mao rang mga ulipon nga gilantaw usab ni Faraon, pero may dakung kalainan sa paglantaw nilang duha.

<sup>47</sup> Gusto kong magbasi sa nianang panghunahuna, karong buntag, sulod sa pipila ka minuto, ug hinaut nga ipasabot kini sa Dios sa Langit sa matag kasingkasing dinhi. Nagadepende kini kung unsa ang imong paglantaw sa unsa mang butang, nga maoy nakahatag og kalainan.

<sup>48</sup> Ang inila nga ebanghilista, nga si John Sproul, nga kinabig sa ministerio ni Igsoong Bosworth, nga pipila kaninyo ang nakahinumdom sa mga tuig na ang milabay, didto sa Old Glory Barn. Miingon siya, usa niana ka adlaw niadtong nagabiyaye siya, sa wala pa kadto mitaliwan ang iyang minahal nga kauban nga asawa. Didto sila kaniadto sa La Salle, Lorraine, sa France. Ug nagkaaduna pud ako og pribilhiyo nga mabisita ang maong lugar. Ug gidala sila sa tigtultol libot sa mga tanaman, ug gipakita kanila ang nagkalainlaing mga butang. Ug miabot sila sa usa ka bantayog ni Ginoong Jesus, nga gilansang Siya sa krus. Ug si G. Sproul nagatindog didto, nga ginatan-aw kadto, siya ug ang iyang asawa, ug, sulod sa ilang mga

kasingkasing, nagakomentaryo kung unsa kaha ang atua sa hunahuna sa nagmugna niadto, o sa eskultor, diay, niadtong iyahang sinilsil diha sa bato, ingon kadto ka mangil-ad tan-awon nga butang para himoong representasyon mahitungod sa pag-antus ug gugma ug kalooy ni Ginoong Jesus, ug kung unsa nga pagkasalikwaut kaayo tan-awon ang pagkakulit niadto. Ug ang tigtultol miduol kang G. Sproul, ug miingon kini, “Sir, nagtoo ko nga duna ka’y komentaryo niining bantayog ni Ginoong Jesus.”

Ug miingon siya, “maingon gyud niana.”

<sup>49</sup> Ug miingon ang tigtultol, “wala man ko natingala, tungod kay kadaghanan sa mga tawo nga nagtan-aw niini, una, dili gyud maayo ang ilang komentaryo niini.”

<sup>50</sup> Ug si G. Sproul miingon, “Bitaw, wala man ko’y unsa mang makita nga malooy ka o unsa mang inspirasyon sa pagtan-aw sa ingon nianang butang, mao nga naghunahuna ko kung nganong ingon niana ang pagkabuhat sa eskultor niini.”

<sup>51</sup> “Ug ang eskultor . . .” Miingon pa, “G. Sproul, okey lang man ang bantayog, ug husto man ang anaa sa hunahuna sa maong eskultor. Pero ang adunay problema, ikaw. Ang paagi lang man sa imong pagtan-aw niini.” Ug gigunitan niya sa kamot si Sproul ug ang asawa niini, ug gigiyahan sila panaug sa altar didto sa tiilan sa niining giingon nga krus. Ug ingon niya, “Karon, G. Sproul, hangad ka.” Ug sa dihang mihangad siya, miingon siya nga daw sa mahugno kono ang iyang kasingkasing. Daku kaayo ang kalainan, nga magtindog didto ug tan-awon kini sa *ingon-nianang* angulo, ug kay sa monaug didto ug tan-awon kini sa paagi nga gituyo kini pagbuhat aron tan-awon kini sa ingon-ana nga paagi.

<sup>52</sup> Ug ingon niana ang Dios. Ingon niana ang pagtoo. Sa paagi mo kini sa pagtan-aw niini. Kung tan-awon mo kini ingon nga usa lang ka pang-kasaysayan nga Biblia, butang nga pang-kaniadto lang, dili mo gayud matagamtaman ang tinuod nga bili sa Biblia. Kinahanglan mong magluhod, ug sundon ang mga sugo sa niining Biblia, ug tan-awon Kini pinaagi sa mga mata sa Balaang Espiritu.

<sup>53</sup> Gusto kong mangutana sa mananambong, karong buntaga. Unsa man nga kaayohan ang mahimo kanato sa usa ka Dios sa kasaysayan kung Siya dili ang mao ra nga Dios sa karon? Unsa man nga kaayohan ang mahimo sa usa ka Dios, nga naggamit kang Moises ug namuhat og mga milagro diha kaniya nga iyang gibuhat, unsa man nga kaayohan ang mahimo kanato sa pagbasa sa ingon niana nga Dios kung Siya dili ang Mao ra sa gihapon karon? Unsa man ang nakaayo sa usa ka Dios nga makaluwas gikan sa nagdilaab nga hudno, sa mga anak nga Hebreohanon, kung Siya dili ang mao ra nga Dios karon? Unsa man ang nakaayo sa usa ka Dios nga maoy nagahukom tali sa matarung ug sayup, sa nangaging mga adlaw, ug silotan ang nagbuhat og

sayup ug panalanginan ang matarung, kung Siya dili ang mao ra nga Dios karon? Para man diay sa unsa ang atong pag-adto sa simbahan? Ngano man nga likayan nato ang mga butang nga iyaha sa kalibutan, kung Siya dili ang mao ra nga Dios sa mao ra nga matang sa paghukom, ug ang mao ra nga opinyon nga mao Siya kanunay? Unsa man ang nakaayo niini sa usa ka Dios nga makahimo sa paghikap sa kamot sa babayeng dunay nagabaga nga hilanat, ug ang hilanat mihunong, kung Siya dili ang mao ra nga Dios karon? Unsa man ang nakaayo sa pag-alagad sa usa ka Dios nga makahimo sa pagtawag sa Iyang higala gikan sa lubnganan, human nga namatay kini sulod sa upat na ka adlaw, kung Siya dili ang mao ra nga Dios karon?

<sup>54</sup> Tungod sa pagtoo kita nagatoo nga sa usa ka mahimayaong adlaw pagatawgon Niya kita gikan sa yuta, bisan kung kita mahimong usa na lang ka kutsara nga abo. Unsaon man nato sa pagpamatuod niini? Dili kinahanglan nato nga magpamatuod niini. Ginatooohan lang nato kini. Walay unsa mang butang nga kinahanglan natong pamatud-an. Ang gikinahanglan kanato mao ang pagtoo niini.

<sup>55</sup> Tungod sa pagtoo si Moises nagbuhat sa *ingon niini-ug-ingon niana*. Ug si Moises, ingon nga usa pa ka batan-ong lalaki, naglantaw didto sa bintana sa palasyo, sa kadtong mga ulipon, nakita niya ang mao mismong pundok sa mga bulingiton, mahugaw, lapokon nga mga ulipon nga nakita ni Faraon.

<sup>56</sup> Ug sa gitan-aw sila ni Faraon, ug sa mga Egiptohanon, mga wala sila'y pulos kondili usa ra ka panon sa mga ulipon. Ingon niana ra ang kapuslanan nila; ang mamahimong maglalapok lamang, aron maghimo og mga tisa nga lapok para gamiton sa mga siyudad nga gipangtukod ni Faraon. Ingon niana lang ang tan-aw sa mga Egiptohanon ug ni Faraon sa maong mga ulipon.

<sup>57</sup> Pero si Moises, sa pagtan-aw niya kanila, lahi ang pagtan-aw ni Moises. Sa pag-agi niya, nakita niya sa bintana, ang dagkung mga labhag diha sa ilang mga nawong, ang mga luha nga nagadagayday sa ilang mga aping, ug ang ilang mga lawas nga nangabuktot na, gilantaw niya sila ingon nga mga katawhan sa Dios. Wala niya lantawa sila ingon nga mga ulipon. Naglantaw siya kanila ingon nga piniling mga katawhan sa Dios.

<sup>58</sup> Ug, oh, sa akong pag-adto, gikan sa usa ka lungsod ngadto sa usa pa ka lungsod, gikan sa usa ka nasud ngadto sa usa pa ka nasud, nga nagawali! Sukad niadtong mibiya ako sa mga pultahan niining gamay'ng tabernakulo, nga usa ka institusyon nga abli sa tanang denominasyon, nga walay balaod kondili gugma, walay libro kondili ang Biblia, ug walay kredo kondili si Cristo, gitan-aw ko ang mga anak sa Dios, ug ang mga sinalikway, ingon nga mga gipili sa Dios ug piniling mga katawhan. Dili ko na sila ginapangutana kung miyembro ba sila sa Branham Tabernacle. Dili ko na sila ginapangutana kung sila

ba mga Methodist, o kung sila mga Presbyterian, o kung sila mga Pentecostal, o mga Nazarene, o mga Pilgrim Holiness. Gusto ko lang nga lantawon sila ingon nga mga katawhan sa Dios. Ug tanawon nga ang ilang mga ginabuhath ug ang ilang mga aksyon, nga sila mga alagad sa Ginoong Dios. Ug ang tinguha sa akong kasingkasing mao nga magpakig-fellowship uban kanila, dili igsapayan kung unsa man ang ilang marka. Nangandoy lamang ako og pagpakig-fellowship kanila. Gimahal ko sila tungod kay nasayod ako nga sila mga katawhan sa Dios.

<sup>59</sup> Sa dihang makita nako ang usa ka babaye nga nagalakaw sa dalan, nga nagsul-ob og taas nga sayal, ug ang iyang buhok nakabuhayhay nga hapsay diha sa likod, ug—ug nagsul-ob og usa ka desenteng tan-awon nga sinina; ug makita ko ang usa pa ka batan-ong babaye, siguro pareho ra ang pangidaron, sul-ob ang pares sa mga purol; siguro siya, ang hitsura, dublehon ang kaanyag kaysa babaye nga adunay tag-as nga buhok, sumala sa tan-aw nga iya sa kalibutan, pero modapig gyud ako uban nianang babaye nga nagsul-ob nga sama sa usa ka Cristohanon. Bisan pa nga ilang biaybiayon siya, ug pagatawgon siya nga usa ka panatiko, sa gihapon, magadapig ako kaniya. Tingali dili siya ingon kaanyag sama sa kadtong usa pa ka babaye, sa hitsura, pero aduna siya’y butang nga nakita. Tungod sa pagtoo nakita niya Siya Nga dili-makita, Nga mao ang nagagiya sa iyang kinabuhi.

<sup>60</sup> Sa dihang makita nako ang usa ka lalaki diha sa iyang ginatrabahoan, nga gibansagan og “diyakono,” o “magwawali,” o “usa ka panatiko,” tungod lang kay nagdumili siya sa pagpanigarilyo, ug sa pag-inum og beer, ug nagdumili sa pag-adto sa mga pagsayawsayaw, sama sa ginabuhath sa uban, ug gibansagan siyang “usa ka panatiko,” ang akong kasingkasing modapig gyud kaniya. Siya’y akong igsoon, nga ania niining Egiptohanong yuta, nga nagapaaghat sa atong kasingkasing nga gakson siya ug sultihan, “Igsoon, mga magpapanaw ra man gud kita ug mga dumuloong, niining yuta, ug nagapangandoy ko nga makapakig-fellowship uban kanimong.”

Kinahanglan gyud ni Moises nga magpili, pagpili pinaagi sa pagtoo.

<sup>61</sup> Pila kaha ka batan-ong mga lalaki kaniadto ang molukso dayon sa maong kahigayonan para mamahimong anak sa anak nga babaye ni Faraon! Pila kaha ka batan-ong mga lalaki ang molukso dayon sa maong oportunidad nga aduna kaniadto si Moises, aron makapahimulos sa tanang mga kalipayan ug dungog nga iyaha sa kalibutan, aron mamahimong hari sa Egipto, aron mapailalum ang tibuok kalibutan diha sa iyahang tiilan! “Daw sa unsa ka binuang nga butang,” ang siguradong gihunahuna sa mga batan-ong kalalaken-an sa iyang adlaw, “sa dihang gipili ni Moises ang iyang pwesto uban sa mga gisakit ug nag-antus nga mga katawhan sa Dios.”

62 Nganong gibuhat man niya kadto? Tungod kadto sa pagtoo, nga sa giyahat niya ang iyang mga mata, milantaw siya lapos sa mga garbo sa niining kalibutan. Milantaw siya lapos sa mga kalipayan sa pagpakasala. Ug miingon ang Biblia nga nagmalahutayon siya ingon nga nakita niya Siya Nga dili-makita, tungod sa pagtoo, ug gipili niya nga alagaran kana nga Dios bisan unsa man ang mahinabo.

63 Wala gyud kini mausab. Daghan kanato ang makaadto sa kung unsa ang atong gitawag nga labi pa ka maayo nga bilding. Matagamtam gyud nato, siguro, ang pagpakig-fellowship ug ang kalipay nga makalingkod diha sa mas maanindot nga bangko. Siguro mahimo kita nga labi pa ka popular, ingon nga nagainum-inum ug nagapanigarilyo, ug nanagsul-ob og maanindot nga bisti ug manglihok nga sama sa kalibutan. Pero unsa ma'y nahitabo? Giyahat mo ang imong mga mata, ug tungod sa pagtoo nakita mo Siya Nga dili-makita, ug mas gipili nimo ang pagbarug uban ang mga sinalikway ug ang mga gitawag nga mga holy-roller sa karong panahon. Tungod kay pinaagi sa pagtoo atong makita Siya Nga dili-makita, nga mas ginapili nga antuson ang pagpanglutos ug mga kasakit.

64 Dili ko moingon sa mga tawo nga kinahanglan nilang pilion ang kasakitan. Wala ko mag-ingon nga kinahanglan pilion nimo ang pag-antus. Wala ka'y pagbati sa tawo kung buhaton mo kana. Pero kung ang pag-antus napahiluna mismo diha sa dalan sa pangatungdanan, nan dawaton nato kini pagnagaabot kini. Dili ko gusto nga buhaton nimo ang usa ka butang aron adunay tawong magabiaybiay nimo. Dili ko gusto nga magsulti-sulti ka og nagapalahi nga mga butang, nga, "Ako usa ka... miyembro man ko sa usa ka iglesia nga wala nagatoo sa *ingon niini-ug-ingon niana*, sa mga kalibutanong," ug sa mga butang nga sama niana, aron lang nga biaybiayon ka sa mga tawo. Ikaw na man hinoon ang nagadala niana sa imong kaugalingon. Wala ko mag-ingon nga mogawas ka dinhi ug buhaton ang kung unsa na lang ug buhaton ang usa ka butang nga pagka-radikal. Dili ko gusto nga buhaton nimo kana, aron nga aduna gyu'y mag-ingon nga usa ikaw ka panatiko. Ikaw man hinoon ang nagadala niana sa imong kaugalingon. Pero kung kini napahiluna mismo diha sa dalan sa imong pangatungdanan ngadto sa Dios, pasagdi ang kalibutan magsulti sa kung unsay gusto nilang isulti. Magpadayon ka lang.

Mamili ka gayud. Ang tanang lalaki ug babaye kinahanglan gayud nga buhaton kini.

65 Unsa kaha kung nakita ni Faraon kung unsa ang nakita ni Moises? Iyang nakita ang mga pag-antus sa mga katawhan. Nasayod siya sa bili nga pagabayran. Pero tungod sa pagtoo gipili kadto ni Moises, kaysa magkaaduna og mga kalipay sa pagpakasala.

66 Siguro adunay gamay'ng, mga batan-ong gining nga nagalingkod dinhi, ingon nga mabihagong batan-ong mga babaye. Ang kalibutan gusto nga magsulti kaninyo, "Buhata ang *ingon niini-ug-ingon niana*. Mamaanyag ka. Maanindot ang porma sa imong lawas. Kinahanglan nga maipasundayag mo kana."

67 Pero, akong igsoong babaye, iyahat ang imong mga mata ug pagtan-aw og lapos niana, ngadto Kaniya nga miingon, "Usa ka dulumentanan para sa usa ka babaye nga magsul-ob og bisti nga iya sa lalaki."

68 Kung ang mga kalalaken-an man sa imong komunidad, kung ang mga kababayen-an man nga kauban nimo, moingon, "Guntinga kanang taas mong buhok. Mas mabugnawan ka. Mas maanindot kung kini mamahimong ingon *niini, niana*, o ang *uban pa*." O, "Himoon ka niini nga labi pa ka mas angayan." Ayaw gyud pagpaminaw niana!

69 Iyahat ang imong mga mata, ug tungod sa pagtoo nakita mo Siya nga nag-ingon, "Ang buhok sa babaye mao ang iyang himaya, ug dili gayud niya kana pagaputlan."

70 Kung moingon sila, "Kini na ang mas urog. Mamahimo kang mas angay sa imong trabaho, o sa imong agalon, kung ikaw maghugoyhugoy sa pag-inom-inom og ginagmay. Kung manigarilyo ka nga sama sa ubang mga kababayen-an, nga ikaw magpahugoyhugoy pa og ayo sa imong mga silingan."

71 Pinaagi sa pagtoo iyahat ang imong mga mata ug maglantaw Kaniya Nga nag-ingon, "Hugawan mo gani kanang lawasa, ug pagalaglagon Ko kana." Tungod sa pagtoo kita nagatoo nianang mga butang. Dili sa mga butang nga imong makita. Sa mga butang kini nga imong ginatoohan. Tungod sa pagtoo, gibuhat ni Moises kaddo.

72 Ug sa niining lakaw sa pagtoo, moabot ang panahon nga kinahanglan mopili ka.

73 Gibuhat ni Lot kaniadto ang masubo nga sayup nga atong ginabuhat. Daghang mga higayon nga nagapili kita para sa atong kaugalingong kaayohan. Ginapili nato ang mga butang nga mahimong labing maayo.

74 Usahay kung dunay gamay'ng away-away nga moabot sulod sa iglesia, ug adunay magsulti, "Bueno, ang diyakono o ang pastor ningdapig man gud niining bahina." Ayaw'g tan-aw niana. Tan-awa kung unsa ang matarung. Tangtanga ang mga nga dili pagsinabtanay ug hiusaha sila. Kana ang diosnon nga butang.

75 Adunay pagpili. Ug atong ginapili ang para sa atong kaugalingon. Atong ginapili ang butang nga para sa ato mismong kaayohan.

<sup>76</sup> Pero mas gipili ni Moises ang mga kagul-anan ug ang kaulawan, aron magalakaw siya nga kauban ang mga katawhan sa Dios. Pamalandunga kana karon. Paminawa kini. “Gipili ang mga kagul-anan sa mga katawhan sa Dios, ug giisip kadto nga usa ka labi pa nga dakung bahandi, kay siya milahutay, nga nagtan-aw Kaniya Nga dili-makita.”

Karon, usa niadto ka higayon, kinahanglan nga mopili usab, si Lot.

<sup>77</sup> Ug tingali, karong buntag, adunay mga kalalaken-an ug mga kababayen-an nga ania karon, nga magahimo sa ilahang kaulahi-ang pagpili. Nahimo ka kung unsa ka karon, tungod kay pipila ka mga tuig ang milabay gipili mo man kung unsa ka karon. Ug kung unsa man ang gipili mo karon maoy mobuot kung unsa ikaw lima ka tuig gikan karon. Lima ka tuig gikan karon tingali usa ka na ka misyonario. Lima ka tuig gikan karon tingali usa ka na ka bantugan nga Cristohanon.

<sup>78</sup> O, lima ka tuig gikan karon tingali atua ka na sa impiyerno, tungod kay sayup man ang nahimo mong desisyon. Lima ka tuig gikan karon tingali usa ka na ka manlimpyohay sa lud-anan diha sa balay-imnanan og bino. Lima ka tuig gikan karon tingali usa ka na ka bigaon diha sa dalan.

<sup>79</sup> O, tingali usa ka na ka lalaki o babaye nga usa—usa na ka mapuslanong lungsuranon sa katilingban, tungod kay gipili mo man si Cristo. Lima ka tuig gikan karon tingali atua ka na sa Himaya, naapil sa Pagsakgaw, tungod sa imong gihimo nga pagpili karon.

<sup>80</sup> Pero kinahanglan nimo nga magpili. Ug ayaw’g tan-awa kung unsa ang imong makita. Pilia ang kung unsay makita mo pinaagi sa pagtoo. Mao kana ang bugtong butang nga mahinungdanon, kung unsa ang gipili mo pinaagi sa pagtoo.

<sup>81</sup> Si Lot, ingon nga kinahanglan niyang magpili. Gihatagan ni Abraham si Lot sa iyang kapilian.

<sup>82</sup> Ug ginahatagan ka sa Dios sa imong kapilian. “Magpili kamo niining adlawa kung kinsa ang inyong alagaron.” Didto sa tanaman sa Eden adunay usa ka kahoy sa—sa kahibalo, ug usa ka Kahoy sa Kinabuhi. Gihatagan ang tawo og pribilihiyo sa pagpili kung hain man niini ang iyang gusto. Ug mao pud kini karon. Gihatagan ka sa imong pribilihiyo, ingon nga gawasnong kinaugalingong pagbulut-an, nga magpili kung unsa ang imong gustong pilion.

<sup>83</sup> Ang akong tambag kanimo, maoy, ayaw og lantaw sa modernong mga butang nga naglibot kanimo, ug ang popularidad ug ang dungog nga mahimo nimong makab-ot. Imbes niana, pilia, pinaagi og pagtoo, Siya nga maoy nagsaad nga sa umalabot nga adlaw Siya moabot ug magtul-id sa tanang mga sayup, ug magahatag kanimo sa Kinabuhing Walay Katapusan, ug magabanhaw kanimo. Bisan pa kung pilion mo

ang gitamay nga dalan kauban sa pipila nga mga iya sa Ginoo, himoa kana nga pagpili. Kung duna ma'y mga problema nga miabot, kung duna ma'y mga problema sa kayutaan, kung duna ma'y problema sa iglesia, kung duna ma'y problema sa panimalay, bisan asa man kini, himoa kana nga pagpili, "Tungod sa pagtoo, mag-alagad ako sa Dios. Akong ipaubos ang akong kasingkasing sa Iyang Presensiya. Pilion ko ang dalan kauban ang mga anak sa Dios. Makita ko man sila nga gitamay ug gisalikway, ug gipanghinginlan ug gibiyaybiay, magpabilin ako sa gihapon sa akong katungdanan. Magpabilin mismo ako. Ug kung motuaw sila, motuaw ako kauban nila. Ug kung duna ma'y kasub-anan, magasubo ako kauban nila. Kung unsa sila magkinabuhi, ikinabuhi ko usab."

<sup>84</sup> Sama sa giingon ni Naomi . . . O, sa giingon ni Ruth ngadto kang Naomi, "Ang imong mga gawi mamahimong akong mga gawi. Ang akong mga dalan mamahimong imong mga dalan. Kung asa ka magpuyo, didto ako magpuyo. Kung asa ka moadto, didto ako moadto. Ang Dios nga imong gialagaran mamahimong maoy akong Dios." Himoa kana nga pagpili, bisan pa kung pakniton niini ang mismong panit sa imong konsensiya, sa paghunahuna nga rangohan ka. Paniti ang imong kaugalingon paubos ug pilia ang dalan kauban sa pipila ka gitamay nga mga iya sa Ginoo, ug magpabilin nga maunungon diha sa natad sa panerbisyo ug katungdanan.

<sup>85</sup> Gilantaw ni Lot ang palibot. Miingon siya, "Aduna ko'y napili." Ug naglantaw siya ngadto sa Sodoma. Nakita niya ang maanindot nga masagbot nga mga yuta nga mas maayo pa sa kung unsa ang nakita ni Abraham, ug ang lugar diin didto si Abraham. Nakita niya ang oportunidad kon diin mapasibsib niya ang iyang kabakahan, para magkaaduna og matambok ug maayong kabakahan.

<sup>86</sup> Nagalaum ko nga wala ko'y napasakitan og pagbati ni kinsa man. Pero mao kana ang posisyon sa daghang mga magwawali, nga ikompromiso ang Maayong Balita, sa paghunahuna nga makakuha sila og daghang salapi tungod niini. [Ginapalampak ni Igsoong Branham ang iyang mga kamot sa makatulo ka higayon—Ed.] Usa ka makuhaan og panginabuhian! Mas gustohon ko pa nga magpuyo sa dili katubongan nga yuta, nga mokaon, moinom gikan sa sapa, ug mokaon og biskwit, kaysa ikompromiso ang akong pagtoo diha sa Pulong sa buhi nga Dios. Mas pilion ko kana nga dalan.

<sup>87</sup> Ang uban kanila miingon, "Billy, unsa man ang nahitabo sa imong mga panagtigum, daghan man lagi og mga Pentecostal." Gisulti kana sa usa ka bantog nga ministro sa denominasyon.

Ang ingon ko, "Mo-esponsor ba diay ang imong denominasyon sa akong mga panagtigum?"



<sup>88</sup> Dili pa lang dugay, sa magasin nga *Look*, nagtoo ko, aduna og usa ka artikulo. Ug gisulti dinha sa magsusulat, gihisgotan niya ang mga tawong Pentecostal. Miingon siya, “Ang iglesiang Pentecostal mao ang pinaka-paspas nga midaghan nga iglesia sa kalibutan karon.” Ngano man? Tungod kay ang mga kalalaken-an ug mga kababayen-an nila giyahat man ang ilang mata ug gilantaw ang halayo.

<sup>89</sup> Ug gidayeg usab sa maong magsusulat ang mga tawong Pentecostal. Oh, siyempre, miingon siya, “Adunay pipila nga nag-radikal, ug uban pa. Pero, ang mga Methodist nagasimba sa usa ka kredo. Nagasimba sila sa Dios pinaagi og kredo. Ingon niana usab ang mga Baptist, ug ang mga Presbyterian. Pero ang Pentecostal nagasimba pinaagi sa iyang Biblia.”

<sup>90</sup> Tungod sa pagtoo atong makita ang saad. Makig-uban ako kanila, bisan pa nga sila mga tinamay, usa gihapon ako nga uban kanila. Bisan pa nga sila gibiyaybiay, ug bisan sila usahay anaa sa taas usahay anaa usab sa ubus, sama sa kung unsa ang Israel kaniadto, dili ko gayu’y gusto motindog kauban ang mini nga propeta bisan didto pa sa bungtod, kauban ang usa ka Balaam, ug maningkamot nga tunglohon kung unsa ang gipanalanginan na sa Dios. Tungod kay, sa sulod niadtong kampo atua ang hinampak nga Bato, ug ang nagkadugo nga Halad, ug ang Haligi nga Kalayo. Bisan unsa pa ang ilang kahintang, ginagiyahan sila sa gihapon paingon sa kadaugan, ug siguradong makadangat gyud sila didto, tungod kay sila man ang mga tawong gisaaran nga nagalakaw pinaagi sa pagtoo. Bisan nga dili sila usa ka denominasyon, mga magpapanaw ra sila, ug ingon niana pud ang mga katawhan sa Dios. Pero gusto kong pilion ang dalan kauban nila, moapil kanila sa ilang laray; dili sa ilang denominasyon, kondili sa pagpakig-fellowship kanila alirong sa mga butang nga iya sa Eternal nga Espiritu sa Dios, nga, tungod sa pagtoo nadawat ko ang bautismo sa Espiritu Santo. Hinaut nga tabangan ako sa Dios nga kanunay maanaa ako og ingon niana nga pamatasan.

<sup>91</sup> Matikdi. Sa ilang pagpadayon, nahibaloan nato nga nakita ni Lot ang mga oportunidad nga—nga maoy magpatambok sa iyang kabakahan. Daghan ang nakakita sa mga oportunidad nga magpatambok sa ilang pitaka. Daghan ang nakakita sa mga oportunidad nga magpamaayo pa sa ilang ang-ang sa katilingban. Nakita niya ang mga posibilidad nga makapanguwarta og dugang pa nga mga dolyar. Nakita niya ang mga posibilidad nga mamahimong mayor sa siyudad. Ingon nga usa ka estranghero, ug usa ka tawong utokan kaayo, sama sa kung unsa siya kaniadto, “Siguro mamahimo ako nga tawong punoan sa siyudad.” Nakita niya ang maong mga posibilidad tungod kay anaa man kadto tanan sa iyang atubangan. Pero wala niya makita ang kalayo nga magalaglag sa maong yuta. Wala

niya maamgo sa iyang kaugalingon, nga ang maong yuta puno na sa sala, ug kinahanglan na kining laglagon sa Dios.

<sup>92</sup> Ug, karon, wala usab maamgo sa mga tawo sa ilang kaugalingon kung pangutan-on mo sila, “Usa ka ba ka . . .?”

Ingon ko, “Usa ka ba ka Cristohanon?”

<sup>93</sup> Moingon sila, “Usa ako ka Amerikano.” Pareho ra kana nga ginapaningkamotan isulti sa uwak nga siya usa ka baki. Wala gyud kana kahilambigitan niini. [Gipakpak ni Igsoong Branham ang iyang mga kamot sa makausa—Ed.]

<sup>94</sup> Pagalaglagon gayud ang Amerika, tungod kay matarung ang Dios. Ug kung makalusot man ang Amerika bisan sa iyang mga sala, ang matarung ug makagagahum, nga balaang Dios maobligar gayud nga—nga bangonon ang Sodoma ug Gomorra ug mangayo’g pasaylo kanila tungod sa pagsunog kanila, tungod sa ilang mga sala; kung Iyang palutson kita bisan sa atong mga sala.

<sup>95</sup> Kung pahanugotan ka Niya nga makasulod sa Langit bisan sa imong dili-matarung nga mga buhat, maobligar Siya nga Iyang bangonon si Ananias ug Safira ug hatagan sila og usa pa ka kahigayonan. Sigurado nga Iya kanang buhaton. Pero matarung Siya. Kuwarta man ang nakita ni Ananias. Pero si Cristo ang nakita ni Pedro.

<sup>96</sup> Oh, my! Wala gyud makita ni Lot ang pagkalaglag sa iyang mga anak niadtong lugar.

<sup>97</sup> Daghan sa inyo, karon, nga nagkupot niining dugay nang mga kredo ug ingon-anang mga butang, wala n’yo makita ang mamahimong mga kalapasan ug kalaglagaan sa inyong mga anak. Wala n’yo gayud makita ang inyong anak nga babaye nga mamahimong mopaingon ngadto sa balay sa kahilayan. Wala n’yo makita ang inyong anak nga lalaki nga mamahimong palahubog, o mamaatua sa kung asa man nga pasugalan og baraha.

<sup>98</sup> “Tungod kay tubigon man gud ang maong lugar.” Ug dili na mahisgotan ang sala. Wala niya makita ang iyang asawa, ang pangulo sa tanang katilingban, nga mamahimong usa na ka haliging asin, sa dihang molingi kini. Wala niya makita ang iyang kaugalingon nga hapit na kaayo unta siyang dili makaikyas, sa iyang pagpalagiw paingon ngadto sa usa ka gamay’ng siyudad, para maluwas ang iyang kinabuhi. Wala gyud niya kana makita, tungod kay nagtan-aw lamang siya sa kung unsa ang makita niya sa iyang atubangan.

<sup>99</sup> Pero, si Abraham, wala siya magtagad sa tubigon nga yuta, kay giyahat man niya ang iyang mga mata ug nakita niya ang ugma, tungod nga magapanunod man siya sa tanang mga butang. Ang tinuod nga Cristohanon karon ginayahat niya ang iyang mga mata ug makita niya ang saad ni Cristo: “Bulahan ang

mga maaghop kay sila magapanunod sa tanang mga butang. Sila magapanunod sa yuta.” Ang tinuod nga Cristohanon, pinaagi sa pagtoo, nagayahat ug makita niya kana. Tawagon n’yo man siya og unsay inyong gusto. Ginayahat niya ang iyang mga mata. Ug sa dihang gibuhat niya kadto, miingon ang Dios, “Abraham, lakaw og suroya ang maong kayutaan, imoha na tanan.” Pinaagi sa pagtoo, gibuhat kadto ni Abraham; ang mao mismong pagtoo nga aduna kaniadto si Moises.

<sup>100</sup> Usa ka komentarista ang nagsulat kaniadto, nga nagsulti niini. Nahunahuna ko nga pagkamaanindot niini nga mga pulong. Niadtong si Abra-. . . “Gikuha ni Moises ang labing maayo sa kalibutan ug gibutang kini diha sa usa ka bahin sa timbangan; ug ang pinakadili maayo nga relihiyon gibutang usab kini sa pikas bahin sa maong timbangan; ug ang pinakadili-maayo nga relihiyon mas labi pa sa gihapon ang gibug-aton kay sa pinakamaayo sa kalibutan.”

<sup>101</sup> Mao pud kini sa karon, nga kung tawagon man kita og bisan unsa na lang nga gusto nilang tawagon kanato, “mga panatiko,” o “Balaanong mananambal,” o “holy-roller,” o unsa man ang gusto nilang itawag. Ang pinakadili-maayo nato molabaw gihapon sa pinakamaayo nga mahimo sa kalibutan. Dili mo man gustong matawag nga “kinaraan, pang-kaniadto, panatiko.” Kini mas molabaw gihapon sa labing maayong butang nga ginatanyag sa yawa diha kanimo. Sigurado gayud.

<sup>102</sup> Mas giisip ni Moises kaniadto ingon nga labi pa ang pasipala nga pagaantuson niya alang kang Cristo. Nakita na niya si Cristo. Sa ulahi nagsulti siya og makapadasig nga mga pulong mahitungod kaniya. “Kita n’yo, ang Ginoo nga inyong Dios magapatindog og usa ka propeta nga sama kanako.” Nasayod siya. Nakita na niya Siya, ug giisip niya ang Iyang pasipala nga pagaantuson ingon nga labi pa ka dakung bahandi kay sa tanang garbo nga iya sa kalibutan.

<sup>103</sup> Higalang Cristohanon, karon, dili mo ba mabuhat kana? Ug bisan pa sa tanang garbo ug popularidad nga iya sa kalibutan, tungod sa pagtoo, makita nato Siya nga mao ang nagsaad. Ug bisan ang pinakadili-maayo nga iglesia karon, bisan pa sa tibuok nga kahimtang niini, molabaw kini sa gihapon kay sa tanang butang nga mahimong itanyag sa yawa kanimo. Mabungkag man kita, magkabulag-bulag man kita, mangalibog man kita ug mabahinbahin, diha sa mga denominasyon ug panatisismo, mas bug-at gihapon kini kung timbangon kay sa tanang butang nga mahimong itanyag sa yawa diha kanimo. Sigurado.

<sup>104</sup> Giisip niya ang pasipala nga pagaantuson alang kang Cristo nga labi pa ka dakung bahandi kay sa tanang mga bahandi sa Egipto. Kung ingon niana kinahanglan nga aduna siya’y buhaton. Gisalikway niya ang Egipto. Oh, gusto ko kaayo kana nga pulong. Gisalikway niya ang Egipto. Kita n’yo, naglantaw

siya kaniadto didto sa mao rang bintana, pero nagalantaw siya kaniadto nga lahi kaysa paglantaw ni Faraon. Unsa kaha kung nakita ni Faraon ang iyang katapusan? Unsa kaha kung nakita ni Faraon nga malumos diay ang iyang nasud? Nakita na kadto ni Moises. Pinaagi sa unsa? Pinaagi ba sa siyensiya? Pinaagi sa pagtoo, nakita kadto ni Moises. Ang tanang butang nga gibuhath niya pinaagi sa pagtoo, tungod kay nagsaad ang Dios kaniadto kang Abraham, sa iyang amahan, nga Iyang—Iyang pagaduawon ang nasud human sa upat ka gatus ka tuig, ug pagulaon sila. Ug pinaagi sa pagtoo, gitoohan ni Moises ang Pulong nga gisulti sa Dios, ug nasayod siya mismo, tungod sa pagtoo, nga siya ang gipili nga mamahimong pangulo nga magpahigawas kanila didto. Nasayod siya sa iyang posisyon. Gipili niya ang iyang puwesto didto sa lapokon nga mga lungag, ingon nga usa ka nagalahid og lapok, ug giisip ang pasipala nga pagaantuson niya alang kang Cristo nga labi pa ka dakung bahandi kay sa maglingkod sa trono sa Egipto. Gipili niya . . . Wala gayud siya magsulti, “Nagsimpatiya lang ako niini.” Gipili niya ang ilang kahintang ug miuban kanila! Himaya sa . . . Gipili niya ang ilang kahintang. Miuban pud kita kanila.

<sup>105</sup> Dili ikatingala nga ang dinihogang magsusulat nag-ingon:

Pagapilion ko ang dalan nga kauban ang pipila  
ka tinamay nga iyaha sa Ginoo.  
Nagsugod ako kauban si Jesus, karon  
mopadayon gyud ko.  
Paadto na ako sa yuta sa Canaan. (Sigurado.)

<sup>106</sup> Si Moises. Adunay nagsulti nga mas gipili kono ni Moises, sa dihang mamahimo man unta siya nga usa ka anak nga lalaki ni Faraon ug puede niyang maangkon ang garbo nga iya sa kalibutan, pero mas gipili niya nga mamahimong anak ni Abraham kay sa mamahimong anak ni Faraon. Usa ka anak nga lalaki ni Abraham, nga mamahimong tinamay, kay sa mamahimong anak ni Faraon, nga hari.

<sup>107</sup> Mas pilion ko nga mamahimong anak ni Ginoong Jesus, ug mamahimong isigka-alagad Niya, ug magpabilin nga kauban sa mga sinalikway sa niining kalibutan, kay sa mamahimong Presidente sa niining bantugang Estados Unidos sa Amerika, o kaha mamahimong usa ka Elvis Presley, o usa ka Pat Boone, o kung unsa man nga gusto n’yo. Pilion nako ang akong dalan.

<sup>108</sup> Ang batan-ong mga babaye kinahanglan magpili sa ilang dalan. Imbes nga mamahimong usa ka—usa ka Mary Pickford, o usa ka bantugan nga artista, usa ka magarbong babaye, angay nga mas pilion mo ang dalan kauban ang mga tinamay nga panon sa Ginoo.

<sup>109</sup> Mas pilion ko nga mamahimong usa ka magwawali diha sa pulpito, nga nagawali sa dili matugkad nga mga bahandi ni Cristo, kay sa mamahimong Hollywood nga artista, o

mamahimong usa ka bantugan nga tawo sa kalibutan. Bisan pa kung halos wala na ko'y makaon, mangayo na lang og limos, o unsa man nga kinahanglan kong buhaton, mas pilion ko ang akong dalan kauban ang mga katawhan sa Ginoo. Pinaagi sa pagtoo, buhaton ko kana. Gitanyagan na ako og mga oportunidad. Pero, tungod sa grasya sa Dios, nakita ko kini sa gihapon tungod sa pagtoo.

Pinaagi sa pagtoo makita ko kini sa halayo;  
 Ug ang atong Amahan nagahulat na sa tabok  
 didto,  
 Aron sa pag-andam kanato og usa ka puloy-  
 anan Didto.

<sup>110</sup> Usa ka maniningil sa buhis ang nagsulti, sa miaging adlaw, “Nganong gihatag nimo ang imong balay ngadto nianang iglesia? Unsa ma'y nagtukmod nimo para ihatag ang pang bayntesingko-kalibong-dolyar nga balay ngadto nianang daan na nga basura ang hitsura nga tabernakulo?”

<sup>111</sup> Miingon ko, “Dili man tungod sa iglesia nga nahimo ko kana. Tungod kini sa mga tawo nga anaa dinha.” Wala ako og unsa mang kabtangan niining kalibutan. Tanang sentimo nga salapi nga akong nadawat napaingon niining iglesia. Ngano man? Ang akong pagtoo anaa man sa Dios, ug dili sa mga butang niining kalibutan. Ang akong mga ginahigugma napahinungod man sa Itaas. Ug nagatoo ko nga mao ra pud kini sa inyo tanan, kung matarung kamo sa atubangan sa Dios. Tinuod kini, nga kamo mao gyud. Kita, pinaagi sa pagtoo, nagadawat. Kita, pinaagi sa pagtoo, nagatoo sa Dios.

<sup>112</sup> Si Moises, kinahanglan niya nga magpili kaniadto. Ug dayon kinahanglan niya, human nga makapili, kinahanglan niya nga makigbisog para sa pagtoo, tungod nga, wala siya mahadlok sa kapungot sa hari. Karon, ingon nga tawo lang, aduna siya'y katungod nga mahadlok sa kapungot. Aduna siya unta og katungod nga mahadlok sa kapungot sa hari, pero wala siya mahadlok. Wala gyud siya mahadlok, tungod kay aduna man siya'y trabaho nga kinahanglan buhaton, ug atua man siya sa linya sa pangatungdanan. Ug wala niya igsapayan kung unsa man ang gisulti sa hari mahitungod niadto. Gipili niya sa gihapon ang Iyang dalan.

<sup>113</sup> Karon, si Faraon, siyempre, sa dihang iyang nakita nga siya napildi, gusto na niyang ihatag kang Moises ug sa mga anak sa . . . Miingon siya, “Sige, isulti ko kanimo kung unsa ang buhaton ko. Magpabilin lang gihapon kamo sa yuta ug puede mong mogawas ug maghalad ngadto sa inyong Dios.”

<sup>114</sup> Ingon niana ang mga buhat sa yawa. “Oh, puede man kamo mamahimong relihiyoso. Nganong dili man kamo moadto didto ug magpamiyembro sa usa ka simbahan? Dili man

ninyo kinahanglan buhaton ang tanan niining mga butang.” Gisultihan sa usa ka lalaki ang iyang asawa . . .

115 Ang asawa miingon, “Bana, naluwas ako. Wala na kanako ang pagpakolor sa mga kuko, o pagpanglipstick ug mga pagpadayandayan. Wala na ko’y mga ingon niana. Wala na’y mga pagparty-party. Wala na kining mga butang pang-kapunongan. Gipangtalikdan ko na kini! Igahin ko na ang akong panahon sa pagbasa sa Pulong, og sa pag-atiman sa panimalay.”

116 “Karon, tan-awa, mahal. Ikaw, puede ka man nga magrelihiyoso, okey ra kana. Karon, tan-awa, ikaw—adtoi ug pagtambong pud ka *niini*. Sayup man gud kanang imong ginasinbahan.”

117 Dili, ayaw gyud. Anaa ka na sa husto. Kung aduna ka og usa ka magwawali nga nagawali niana kanimo, kinahanglan kang magpabilin dinha. Susiha balik ang mga Kasulatan ug susiha kung husto ba.

118 “Oh,” moingon, “lakaw tambong pud ka *dinhi*. Dili nila—dili man nila *dinhi* kinahanglan nga buhaton kana. Kita mo? Wala man nila ginabuhat kana *dinhi*.” Ingon niana ang paagi. . . “Ginapahanugotan kang buhaton kini nga hangtud ra dinha.” Pero dili niya gusto nga makagawas ka sa iyahang yuta. Ingon niana ang ginabuhat sa yawa. Dili niya gusto nga makagawas ka sa mga butang nga iya sa kalibutan; kinahanglan dala mo sa gihapon ang kalibutan diha sa imong pagsimba.

119 Sa miaging adlaw, sa akong pagbiyahe, gibuksan ko ang akong radyo. Ug dihay usa—usa ka kanta, ug nagpadayon ko sa pagpaminaw, ug kinahanglan ko nga paminawon, halos, ang tibuok kanta, sa dili ko pa masulti kung kini ba usa gayud ka relihiyosong kanta, o ang yawa kini nga gustong birahon paubos ang mga butang nga iya sa Dios ngadto sa lebel nga iya sa kalibutan. Dili mo puedeng buhaton kana! Kaloy-an pa unta kita sa Dios!

120 Dili ko igsapayan kung pila pa ka mga album ang gisulat ni Elvis Presley, sa tanan niyang maayong relihiyosong mga kanta. Gigamhan sa gihapon siya sa yawa. Siya ang naghatud sa daghang mga kaanakan ngadto sa impiyerno, ug labi na ang tanan nga mga salida nga nasayran ko, sa tibuok kalibutan niini karon. Si Pat Boone ug ang uban pa kanila, miyembro siya sa church of Christ; ug si Elvis Presley usab, nga usa ka Pentecostal; mga Judas Iscariote sila, nga anaa sa porma nianang mga kalalaken-an. Ginapaningkamotan sa yawa nga dalhon ang halangdon nga mga butang nga iya sa Dios, aron nga mahimo nila nga isagol-sagol kini uban *niini*. Dili na ang mga tawo motan-aw kung may labaw pa *niini*. *Dinhi* ra sila motan-aw, moingon, “Bueno, pareho ra man.” Dili gyud kini pareho. Mogawas gyud kamo kinahanglan sa yuta.

<sup>121</sup> Miingon, “Mahimo man nga moadto mo sulod sa pila lang ka mga adlaw. Ug lumakaw mo, pero magpabilin lang gihapon mo sa yuta.” Sigurado, nasayod siya nga kinahanglan nilang mamalik. Dayon naamgo niya nga dili kini magpulos, mao nga aduna siya’y nahunahuna nga lahi. Miingon siya, “Sultihan ko kamo kung unsa ang inyong buhaton. Lumakaw kamo sa kung asa ang gusto ninyong adtoan, pero ibilin lang ang inyong mga asawa, ang tanan ninyong mga anak, ug ang tanan ninyong mga baka, og mamalik *dinhi*. Ibin ninyo sila dinhi, ug puede na kamo molakaw.” Tungod, nahibaloan niya nga aduna sila og mga kabtangan didto, mao man kana ang magpabalik kanila.

<sup>122</sup> Ug ingon niana usab ang ginasulti sa yawa kaninyo. Basta ipapabilin n’yo lang ang ubang mga butang nga iya sa kalibutan diha kaninyo, nga gusto n’yo sa gihapon manigarilyo, nga gusto n’yo sa gihapon mag-inum-inum, nga gusto n’yo sa gihapon magbisti nga sama sa kalibutan, ingon niana mismo ang gusto sa yawa.

<sup>123</sup> Daghan akong nadungog bahin sa mga pag-backslide. Dili ko motoo nga adunay ingon niana ka daghang mga pag-backslide sama sa ginahunahuna sa mga tawo. Daghan lang kaayo nga kabtangan ang gibilin nila sa Egipto para maoy moaghat kanila pabalik, kana ra. Ang mga pag-backslide dili ingon niana sama sa kung unsa ang ilang ginasulti. Daghan lang kaayo nga iya sa kalibutan ang gibilin n’yo didto, nga maoy nagapabalik kaninyo.

<sup>124</sup> Igsoon, sultihan ko kamo, niadtong nangandam na ang Israel, sa tungang gabii, anaa na kanila ang tanang butang nga gikinahanglan nila nga aduna niining kalibutan, ila nang gipangputos ug andam na sila sa pag-adto.

<sup>125</sup> Hinaut nga padalhan kita sa Dios og usa ka rebaybal nga sama niana. Andamon nato ang tanan, ug mangandam na sa pag-adto. Moabot na ang pangtungang-gabii nga singgit, “Panggawas kamo og sugata Siya.” Siguradoha nga naandam n’yo ang tanan. Siguradoha nga wala kamo ni bisan unsang butang, nga iya sa kalibutan, nga magaghat kaninyo pabalik, unsa mang mga higot nga nakahigot pa kaninyo. Pamutos na. Mangandam na kita. Pabiya na kita.

<sup>126</sup> Ug kabalo ba mo kung unsa? Sultihan ko kamo, nagmatinud-anon gayud sila sa Dios, hangtud nga napungot og ayo si Faraon niadtong tungang gabii, miingon siya, “Panggawas mo! Gawas, ug panglakaw mo. Dal-a ninyo ang tanan nga anaa kaninyo, ug lakaw na!”

<sup>127</sup> Nalipay ako’g maayo nianang tawo nga magkinabuhi nga madutduton sa Dios, hangtud nga ang yawa dili na makahibalo kung unsay pagabuhaton kaniya. Husto kana. Gawas! Lakaw na! Pagsunod sa Dios!

128 Pinaagi sa pagtoo, nakita niya ang saad. Tig-lahid man og lapok, o dili, gipili niya ang iyang dalan kauban sa tinamay nga gamay'ng panon sa Ginoo. Miingon si Faraon, "Dalha ang tanan-tanan kaninyo ug panghawa kamo dinhi! Dili na ko makahibalo kung unsay pagabuhaton kaninyo." Nagmatinud-anon gayud si Moises sa Dios, tungod sa pagtoo.

129 Ang pagtoo magahimo'g mga milagro, kung magpabilin ka lang nga matinud-anon sa Dios. Pinaagi sa pagtoo, makita nato Siya.

Tapos na ang atong oras; lapas na sa oras.

130 Pero, pinaagi sa pagtoo, karong buntag, iyahat ang inyong mga mata. Ayaw pagtan-aw kung unsa ang anaa sa inyong palibot, sa niining modernong kalibutan, kondili lantawa ug tan-awa Siya Nga mao'y naghatag og saad. Ang Biblia nag-ingon, "Dili pa nato perpektong makita ang tanang butang sa karon, pero makita nato si Jesus." Pagmolantaw lang mo Kaniya, karong buntaga, ug mabag-o gyud ang inyong dalan.

131 Samtang giduko nato ang atong mga ulo, sa kadali, para sa pag-ampo. Hinaut nga dugangan sa Ginoo ang Iyang mga panalangin sa niining Mensahe.

132 Palandunga karon sa inyong mga kasingkasing. Nagatan-aw ba kamo sa mga butang nga iya sa kalibutan? Pinaagi sa pagtoo, makita mo ba si Jesus? Nagatan-aw ka ba sa imong pagkapopularidad, sa imong iglesia? Sa kung unsa ang imong ang-ang sa katilingban niining kalibutan? O, nakita mo ba si Jesus Nga, sa kalooy, milingkod Mismo diha sa tuong kamot sa Halangdon sa Kahitas-an, Nga nag-atus ingon nga usa ka martir, ang matarung para sa di-matarung? Dili mo ba maiyahat ang imong mga mata ug makita kanang Kahoy sa Kinabuhi didto? Kung ingon niana, biyai kining kahoy sa siyensiya ug kahibalo, ug alagaran Siya.

133 Gusto ba nimo nga mahinumduman diha sa pag-ampo sa dili pa ako mag-ampo? Ipataas ang imong mga kamot, para sa bisan unsa man nga hangyo nga tingali imong gikinahanglan. Panalanginan ka sa Dios. Nakita Niya ang inyong mga kamot.

134 Kung ikaw usa ka makasasala, iyahat ang imong mga mata ug tan-awa karon. Kung ikaw dugay nang walay pagtagad, kung ikaw adunay gagmay'ng mga away-away ug gagmay'ng ingon-anang mga butang, unsa ma'y kalainan niana? Mamatay ka usa sa niining mga adlaw. Unsang adlaw? Mahimong karon! Wala ka kabalo. Tingali usa ka oras gikan karon, atua ka na sa impiyerno, o tingali atua ka na sa Langit. Pero kinahanglan ka nga mopili karon. Kung aduna ma'y dili matarung sa imong kinabuhi, magpili ka na karon, pinaagi sa pagtoo.

135 Moingon ka, "Bueno, kung makapanimalus lang unta ako sa maong babaye! Kung makapanimalus lang unta ako sa maong



lalaki!” Bisan unsa pa ang ilang gibuhath, pilia ang Kinabuhi. Pilia gyud ang Kinabuhi.

<sup>136</sup> Tungod kay, si Jesus miingon, “Kung dili mo mapasaylo ang tanang tawo sa ilang mga kalapasan diha sa imong kasingkasing, dili usab ikaw pasayloon sa imong Langitnong Amahan.” Busa paninguhaa bisan haduol ra niana. Kung adunay gamay’ng butang sulod sa imong kasingkasing nga may kasuko ni bisan kinsa nga tawo, makasasala man o usa ka balaan, namiligro ka sa kalayo sa impiyerno.

<sup>137</sup> Karon iyahat ang imong mga mata. Unsa man ang imong nakita, kaaway ba nimo? O, ang imo bang Manluluwas ang imong nakita? Unsa ba ang imong nakita karong buntaga?

<sup>138</sup> Kung ikaw masakiton, ug ang imong doktor nagsulti nga dili ka na mamaayo, iyahat ang imong mata, ngadto sa krus, kon diin Siya gisamaran tungod sa atong mga kalapasan, pinaagi sa Iyang mga labod kita nangaayo. Ayaw pagtan-aw sa ginasulti sa doktor; nagtrabaho lang siya sumala sa siyensya. Ang pagtoo nagapamuhath diha sa natad sa Espiritu ug sa Dios. Pamalandongon nato kining mga butanga karon samtang gipataas mo ang imong mga kamot. Nakita sa Dios ang imong mga kamot.

Mag-ampo kita.

<sup>139</sup> Oh Eternal nga Dios, sa kahilum niining pagsimba namo karon, human nga nawali na ang Mensahe, ayaw itugot nga kadtong mga binhi sa Imong Pulong, Ginoo, mahulog ngadto sa mga mabato nga yuta. Ayaw itugot nga ang maong Mensahe, Ginoo, mahulog taliwala sa mga sapinit, sa mga tunokon, nga ang mga kabalaka sa niining kinabuhi (sama ni Lot) magalumos niini, sa katapusan, nga mahimong isalikway. Pero, Oh mapanalanginong Dios, hinaut nga mahulog kini sa maayo, mabungahong mga yuta, sa mahinulsolong mga kasingkasing. Ug sa ako, usab, Ginoo, nga kaming tanan magalantaw pinaagi sa salaming lantawan sa Dios, ug makita ang sinalikway nga Iglesia ni Ginoong Jesus, ang sinalikway nga mga katawhan, ang sinalikway nga dalan, ug hinaut nga magalakaw kami nianang mahimayaon nga dalan.

<sup>140</sup> Sama kaniadto ni Moises, nga wala siya mahibalo kung asa siya moadto. Wala usab mahibalo ang mga katawhan kung asa sila moadto. Wala sila mahibalo kung asa nga direksyon sila paingon. Basta milakaw lang sila.

<sup>141</sup> Ug, Oh Ginoong Dios, samtang ginatugtog kining maanindot nga himno, tungod sa pagtoo makita namo ang maong Yuta sa halayo. Tugoti lang karon, nga ang mga kalalaken-an ug mga kababayan-an dinhi dili maghunahuna kung unsa ang isulti sa kalibutan, o kung unsaon nila pag-adto. Hinaut nga manindog lang sila diha sa ilang espiritu, ug maglakaw.

<sup>142</sup> Gisundan kaniadto ni Moises ang Kahayag, ug gidala Niini siya ngadto sa yutang saad. Nga bisan wala siya mahibalo kung asa siya paadto, pero naglakaw lamang siya diha sa Kahayag, padulong nianang yuta nga labi ka hayag kaysa adlaw.

<sup>143</sup> Itugot, Ginoo, karon, nga daghan dinhi ang maglakaw diha sa Kahayag sa Kasulatan ug sa pagpakig-fellowship sa Espiritu Santo, ug sa Iglesia; ang Iglesia, ang Kamagulangan, ang mga bata nga bag-ong nangatawo nga nakadawat kang Cristo, ug mga gipuno sa Espiritu Santo, mga gipangulohan sa Espiritu. Hinaut nga magalakaw kami sa niining pagpakig-fellowship, nga nagkahiusa, alirong sa mga lagda sa Dios, nga nagaalagad Kaniya diha sa bautismo, nga masinugtanon sa Iyang kamatayon, paglubong, ug pagkabanhaw. Hinaut nga kami mag-alagad Kaniya diha sa Iyang sugo, “Magpabilin kamo sa Jerusalem hangtud nga kamo kabuboan sa Gahum gikan sa Kahitas-an.” Hinaut nga kami mag-alagad Kaniya diha sa Balaanong pagpang-ayo, nagapang-ampo para sa mga masakiton. Hinaut nga kami mangalagad Kaniya diha sa komunyon, sa pagpikas-pikas og tinapay, nga may pagpaubos sa kasingkasing, sa pagpakig-ambit sa Pulong sa Dios. Hinaut nga kami mangalagad Kaniya diha sa tanan Niyang Balaanong mga lagda, hangtud nga ang Yuta makita na. Itugot kini, Ginoo. Dunga ang among pag-ampo, samtang among ginatugyan kining tanan nganha Kanimo karon, sa Ngalan ni Ginoong Jesus.

<sup>144</sup> Karon samtang nagaduko ang atong mga ulo, sa kahilum, sa hinayhinay, kantahon nato kini nga kanta. Kini na karon ang pagsimba. Tapos na ang mensahe. Walay usa nga molakaw. Maghilum lang. Managsimba kita.

<sup>145</sup> Nagapanul-id ang mensahe. Pamalandonga karon kung unsa ang imong nangabuhat, kung unsa ang kinahanglan unta nga imong nabuhat, kung unsa kaha ang nagpahimo kanimo kung unsa ikaw karon. Kung unsa ang nagkondena nimo, karon, tungod kay aduna ka man gibuhat nga usa ka butang kagahapon. Mao usab kung unsa ang mahitabo ugma? Itul-id mo na kini sa karon, ug mamahimo kang gawason ugma. Kita n'yo? Kinahanglan nimo nga mopili. Unsaon man nimo paghimo niini? “Pinaagi sa pagtoo, ako na karon ginasalikway ang tanan. Ako na kini tanan ginasalikway, ug sa umalabot nga adlaw moadto ako Didto.”

In the sweet by and by,  
We shall meet on that beau- . . .

Simbaha lang ang Ginoo sa inyong espiritu karon.

In the sweet by and by,  
We shall meet kanang tinamay nga Iglesia.  
(Malisud nga panaw, pero magkitaay ra kita  
sa umaabot nga adlaw.)

To our bountiful Father above,  
 We will offer our tribute of praise,  
 For the glorious gift of His love,  
 And the blessings that hallow our . . .

Nga mamahimong kauban ang gamay'ng panon nga mga tinamay nga iya sa Ginoo, pinaagi sa pagtoo, kini'y ginapili ko.

In the sweet (in the sweet) by . . . (by and by)  
 We shall meet on that beautiful shore; (by and by)

In the sweet (in the sweet) by and by,  
 We shall meet on that beautiful shore.

There's a Land that is . . .

Simbaha mismo Siya. Kini na ang pagsimba.

. . . faith I can see,

Pinaagi sa pagtoo ako nagpili.

Oh, the Father waits . . .

<sup>146</sup> Nakita ko ang tanan nga iya sa Ginoo Didto; Si Igsoong George, si Igsoong Seward, ang tanan nga mga balaan.

. . . us a dwelling place There. (Oo, Ginoo!)  
 The sweet . . .

<sup>147</sup> Ang iyang papa, si Howard, si Edward, ang tanan nga mga higala ko kaniadto nga balaan nga gipili kana nga Dalan, didto, sa dugay na nga panahon.

In the sweet (Oo, Ginoo!) by and by (by and by),  
 We shall meet on that beautiful shore.

We shall sing on that beau- . . . (Oh Dios!)  
 The melodious songs of the blest, (Himaya sa Dios!)

. . . shall sorrow no more,  
 Not a sigh for a blessings of nianang Lugar nga kaphulayan.

In the sweet, sweet by and . . . (by and by)  
 We shall meet on that beau- . . .



*TUNGOD SA PAGTOO, SI MOISES* CEB58-0720M

(By Faith, Moses)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Hulyo 20, 1958, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)